

VEXIL'ÒC



REVISTA OCCITANA DE VEXILOLOGIA - ISSN 2117-9166
N°21 - DECEMBRE DE 2014

ИСЛАМСКОЕ
ГОСУДАРСТВО

ИРАКА И ШАМА

جمهورية
دونيتسك
الشعبية

جمهورية
لوهانسك
الشعبية

*Inversion dimatges, la zona d'ocupacion russa en Ucraïna orientala
sus la bandiéra de Daesh, e recipròcament.*

Ensenhador

Una annada abandierada (Joan Francés Blanc)	3
Bandièras nòvas e pas tant nòvas en Asia pròcha (Joan Francés Blanc)	4
Guerra en Euròpa: l'invasion d'Ucraïna (Joan Francés Blanc)	7
França: Lo jòc de las regions (Joan Francés Blanc)	15
Lo principat de Lars (Joan Francés Blanc)	16
<i>Eraldica occitana</i> , un sit de visitar (Joan Francés Blanc)	17

ESBRIGAHS

Joan Francés Blanc

BANDIERAS DEL MOND




EDICIONS
TALVERA

Bandièras del mond, per Joan Francés Blanc,
a las edicions Talvera: <http://edicions.talvera.free.fr>

Una annada abandierada

Joan Francés Blanc

L'annada que s'acaba foguèt rica en eveniments vexilologics. L'aparicion de l'estat dich islamic en Asia, l'invasion e l'ocupacion d'una part d'Ucraïna per Russia, l'afortiment d'identitats nacionalas (los curds, los escocés, los catalans...) an mirgalhat la premsa de bandières de tota mena. Avèm agut de mal a seguir l'actualitat e a la reportar dins l'Enciclopèdia de las bandières en linha. La revista deu tanben demorar un lòc d'escambis. Las entresenhas de contacte son marcadas suls sites emai dins los fichières PDF, trantalhetz pas a nos escriure.



Bandières nòvas e pas tant nòvas en Asia pròcha

Joan Francés Blanc

Lo desengatjament militar dels Estats Units en Irac, e a l'encòp lo finançament de l'opausicion al dictador sirian Assad an afavorit la naissença d'un mòstre que se ditz estat e qu'exèrça la realitat de l'autoritat d'un estat dins de braves bocins de Siria e d'Irac. L'organizacion dicha « Estat Islamic » se cambièt mai d'un còp lo nom : foguèt « Estat Islamic en Irac, » puèi « Estat Islamic en Irac e a Damasc, » puèi « Estat Islamic » sens precision geografica qu'an l'ambicion de venir un estat unic per tot lo monde musulman. Son dintrats en concorréncia amb d'altres organizacions qu'an pas lo territori tant important.

Un pauc de terminologia per començar. L'organizacion se ditz ara « Ad-dawla al-islāmiyya » (estat islamic). Abans precisava « fil 'Irāq wa ash-Shām » (en Irac e a Damasc). Es de mal comprehende perqué en anglés ash-Sham foguèt revirat per « lo Levant », quora se sap qu'es lo nom arabi tradicional per Damasc. Quitament abans d'èsser « en Irac e a Damasc, » èra sonque « en Irac ». Ten sas raices dins un grop nomenat Jama'at al-Tawhid wal-Jihad (organizacion pel monoteisme e lo jihad) creat en Jordania en 1999.



Bandiera de l'Estat Islamic



Bandiera del front al-Nusra en Siria

Se pòt tanben utilizar l'acronim Daesh (per daulat e ash-Sham). Una autra

organizacion d'opausicion al regim sirian, lo front al-Nosra, utiliza tanben una banièra del fonds negre.

La bandièra negra (*rāyat al-sawdā'*) es considerada coma tradicionala dins las tèrras musulmanas. Foguèt auborada en 747 al moment de la revòlta abassida. Pasmens la tradicion e l'istòria mòstran un usatge parallèl d'una bandièra blanca. Fin finala, lo blanc venguèt a simbolizar lo chiisme e lo negre lo sunnisme. La bandièra d'al-Nòsra mòstra la shahada, la profession de fe musulmana que se retròba sus la bandièra de l'Aràbia Saodita. La bandièra de Daesh dona una version corta d'aquela shahada, e dins un cercle blanc, lo sagèl de Mohamad (la primièra linha pòrta *allab* – Dieu, la seguida *Muhammad rasul* – Mohamad lo messatgièr).



Bandièra de l'estat iraquian



Bandièra de la region autonòma del
Curdistan d'Irac



Milicians chiitas iraquians
(imatge sens font
trobat sus internet)

En Irac, l'estat de drec s'es replegat al Sud, dins las regions chiïtas, ont i a de miliças de las bandières pro ricas, amb de representacions umanas que son permesas dins aquela modalitat de l'islam, al contrari del sunites.

La situacion es l'escasenç pels Curds de trobar mai d'autonomia. Es lo cas en Irac, que la region autonòma dicha del Kurdistan del Sud fonciona d'un biais gaireben independent de l'estat iraquian. Es la meteissa causa en Siria amb lo Curdistan « occidental » (Rojava) que s'establiguèt al nòrd de l'estat e que lucha a Cobanè contra l'Estat islamic.



Bandiera de l'estat sirian



Bandiera de l'opausicion siriana



Bandiera del Kurdistan sirian



Bandiera dels assirians

En Siria, lo governament d'Assad ten encara la capitala e una pichona mitat occidentalala de l'Estat (en ròsesus la carta de la pagina 3). L'opausicion (en vèrd) arbora la bandiera adoptada en 1946 al moment de l'independéncia (amb las tres estelas rojas). L'estat islamic ocupa la part en gris, lo front al-Nosra, lo territori en blanc, Rojava la part en jaune.


Enfin, Siria qu'es a l'origina del nom del pòble assirian, siriac o aramèu, que parla encara uèi una lenga semítica que se pensa que la parlavan en Palestina al començament de l'epòca cristiana. L'agla de Gilgamesh es sus un fons roge que fa memòria del genocidi siriac (saifo) que patiguèron, a la mateissa epòca que los armènis e los grecs, per part de l'empèri otoman. Entre 275000 e 400000 assirians moriguèron a la fin del s. XIX e al començament del s. XX.

Guèrra en Euròpa: l'invasion d'Ucraïna

Joan Francés Blanc



Bandiera d'Ucraïna



Bandiera de la Repùblica autònoma
de Crimèa en Ucraïna



Bandiera dels tatars de Crimèa



Bandiera de la vila de Sevastòple en
Ucraïna

La guèrra es tornada en Euròpa amb l'invasion d'Ucraïna per Russia. Coma sovent, un poder sens vertadiera eficacitat fa jogar lo « nacionalisme » per

amagar son fracàs. Aital, l'invasion de Crimèa e l'annexion per Russia fogueron acompañadas dins l'est e lo sud de l'estat ucraïnés de susmautas provocadas per d'agents dels servicis de rensenhament neosoviètics. Doas republicas autoproclamadas e protegidas per de soldats rus son nascudas dins l'est de l'estat ucraïnés, e se son quitament federadas dins una Nòva Russia qu'a pas res de nou.



Cal primièr ramentar que l'espandida dels ucraïnés correspond pas brica amb l'estat ucraïnés actual. D'ucraïnés n'i a encara fòrça en Russia, dins Coban (a l'est de la mar d'Azov) mas tanben en Siberia e al Cazacstan, qu'a las meteissas colors dins sa bandièra.

Se coneis pas pus gaire l'istòria de l'Ucraïna verda, aquel parçan de Siberia extremorientala que foguèt mai o mens independenta entre 1918 e 1922.

I agèt tanben una republica ucraïnesa independenta al Coban. Proclamada lo 28 de genièr de 1918, durèt entrò 1920. Los quites soviètics, a l'entorn de 1930, cugeron annexar lo parçan a Ucraïna, mas finalament se vireron a una russificacion massissa.




Mapa de l'Ucraïna verda



Bandiera de l'Ucraïna verda



Bandiera de la república de Coban



La preséncia ucraïnesa al Coban al recensament de 1926



La república de Dòn



Bandiera de la república de Dòn

I agèt tanben una autra república dins la ríbièra de Dòn, tanben de 1918 e

1920, amb lo rus e l'ucraïnés coma lengas oficiales.


Mas es ora de tornar a Crimèa. Autres còps poblada de grècs, venguda un estat (canat) tatar, Crimèa foguèt annexada per l'empèri rus lo 19 de març de 1783. Lo 13 de decembre de 1917, l'amassada dels tatars proclamèt la Republica populara de Crimèa (amb Noman Çelebicihan coma president) emai l'egalitat de las nacionalitats presentas sul territòri (a l'epòca, 42 % de rus e 11 % d'ucraïnés). Durèt pas gaire que los marins de la flòta de la mar negra, partisans dels bolchevics, prengueron lo poder, assassinèron lo president sens procès e acabèron l'ocupacion de Crimèa a la fin de genièr de 1918.



Bandiera de la Republica populara de Crimèa (1917)



Bandiera de la Republica socialista e sovietica de Taurida



Bandiera dels govern regional de Crimèa



Bandiera dels governs russes blancs de 1919 a 1920

La RSS de Taurida de la bandiera roja qu'establigueron durèt pas gaire que Crimèa foguèt ocupada per las armadas alemandas e de la Republica

populara d'Ucraïna (de la meteissa bandièra que l'actuala) lo 30 d'abril de 1918. Los alemands refusèron l'annexion per Ucraïna e daissèron s'installar un govern regional jos l'aflat dels tatars. Aquel govern durèt del 25 de junh de 1918 fins a 1919, que los bolchevics ocupèron Crimèa e proclamèron en mai la Republica socialista e sovietica de Crimèa. Aquela durèt pas qu'un mes, que los russes blancs tornèron prene Crimèa. Los governs de Deniquin e de Vranguèl tenguèron Crimèa entrò novembre de 1920, que los bolchevics establigueron lor poder d'un biais mai definitiu.

K.p.C.C.P.
ق س ش ج

KpACCP
QrMSSÇ

Bandièra de la RSSA de Crimèa
(1921)

Bandièra de 1929

PCΦCP
KpACCP

Bandièra de 1938 a 1945

Lo 18 d'octobre de 1921 foguèt proclamada la Republica socialista e sovietica autònoma de Crimèa, dins l'encastre de la Republica sovietica federativa e socialista de Russia. Inversèt sovietic e socialista dins son nom en 1936. Agèt tres bandièras successivas. Las doas primières portavan l'acorcha en tatar e en rus, la tresena aviá fòrabandit lo tatar.


Lo 30 de junh de 1945, la republica foguèt abolida e Crimèa venguèt un oblast (districte) de la RSFSR. Lo 29 d'octobre de 1948, la ciutat de

Sevastòple foguèt separada de l'oblast e declarada ‘ciutat barrada’ (interdicha als estrangiers). Lo 19 de febrièr de 1954, Crimèa foguèt transferida de la RSFSR a la RSS d'Ucraïna. En 1978, la ciutat de Sevastòple foguèt reintegrada dins l'oblast. La RSSA de Crimèa foguèt restaurada lo 12 de febrièr de 1991, dins l'encastre de la RSS d'Ucraïna. A l'independéncia d'aquela, Crimèa (sens Sevastòple) obtenguèt l'estatut de Republica autonòma. Sevastòple demorèt contestada entre Russia e Ucraïna entrò 1997, que Russia acceptèt finalament son inclusion dins Ucraïna coma vila de l'estatut especial.



Lo 28 febrièr de 2014, pasmens, l'armada russa prenguèt lo contaròtle de Crimèa e faguèt proclamar lo 17 de març una republica de Crimèa independenta (del meteis tricolòr que la republica autonòma), sus tota la peninsula. Tre lo 18 de març se demandèt l'annexion per Russia, que foguèt acceptada sulpic e ratificada lo 21 de març. Dempuèi aquela data, Crimèa es administrada per Russia coma dos subjèctes diferents, la republica de Crimèa e la ciutat federala de Sevastòple. Las doas entitats an gardadas las meteissas bandièras que del temps d'Ucraïna.

L'expansionisme rus toquèt tanben l'est e lo sud d'Ucraïna, la region que los tsars sonavan « Russia Novèla ». Capitèron de far proclamar, a la prima de 2014, doas « republicas » dins los districtes ucraïnés de Donietsc e Lohansc.



Bandièra del districte ucraïnés de
Donietsc



Bandièra del districte ucraïnés de
Lohansc



Primière bandièra de la dicha
República populara de Donietsc



Primière bandièra de la dicha
República populara de Logansc

Lo 7 d'abril de 2014 lo colonèl rus Igor Grilquin escaissat Estrelcòv proclamèt la República populara de Donietsc. Lo 27 d'abril de 2014 se proclamèt a Lohansc la República populara de Logansc, presidida pel sargent rus Bolotòv.

Après quelques setmanas se proclamèt una confederacion de las doas

entitats jol nom de « Novorossia » o « Union de las republicas popularas ».




Nòva bandièra de la dicha RP de
Donietsc



Nòva bandièra de la dicha RP de
Logansc



Bandièra de la « confederacion » de
Novorussia.



Cal apondre que las doas « republicas » se cambiaron ja un còp de bandièra. La de Logansc pòrta ara sonque l'acorcha LNR (en cirillic), la de Donietsc lo nom compket (republica populara de Donietsc).

França: Lo jòc de las regions

Joan Francés Blanc

En decembre de 2014 lo procès de recentralizacion de l'estat francés avancèt amb la votacion de la lei que redusís a partir de 2016 lo nombre de las regions de França metropolitana. Es pas inutil de rapelar que la decentralizacion es complètement illusòria: l'estat es unitari e las « collectivitats » an pas de poder legislatiu, pas cap d'autonomia.

Per Occitània, la fusion de regions fa passar las regions de lenga occitana de 9 a 5. Las regions PACA e Centre son gardadas, mas Centre ven Centre-Val de Léger. De las bandièras « oficialas », aviam sonque la de PACA e la d'Aquitània. Las autres mens oficialas (véser *Vexil'Òc* n°17) las podèm reutilizar per presentar de projèctes.



Proposicion per Aquitània, Lemosin
e Peitau Charantas




Autra version amb las vaquetas de
Bearn



Autra version amb lo leon roge de
Gasconha



Proposicion per Lengadòc
Rosselhon e Miègjorn Pirenèus




Proposicion per
Auvèrnhe e Ròse Aups

Lo principat d Lars

Joan Francés Blanc

La vexilologia ei tanben lo parat d'arríder. Atau Jacques Pédehontaà, maire de Lars, en Bearn, se hè publicitat en proclamar un principat. La banèra repren las vaquetas dab ua estelada drin catalana.



Lo maire damb la banèra deu « principat ».

Après ua letra enviada au president de la republica francesa en 2011 , segueish en 2014 en declarant lo principat com... associacion a la prefectura de Pau.

Eraldica occitana, un sit de visitar

Joan Francés Blanc

De còps la vexilologia es classada demèst las sciéncias auxiliarias de l'istòria, aital coma l'eraldica o sciéncia dels blasons. A propaus d'eraldica, nos cal senhalar un site de qualitat sus l'eraldica occitana, que justament se ditz *Eraldica occitana*.

Aquel site, creat per Olivìer Dalhut-Calvinhac, es gavidat per una còla d'amators esclairats, entamenèt un travalh de fons sul lexic de l'eraldica amb l'ajuda d'Auban Bertero, que ven de publicar un libre, *Blasonar en occitan*.

The screenshot shows the homepage of the blog. The header is orange with the title "eraldica-occitana.over-blog.com". Below the header, there's a dark sidebar on the left containing a logo (a heraldic shield), the word "PRESENTACION", and links to the blog's categories and description. The main content area features a map of the region of Noalhas, Brivadés, Bas-Lemosin, with a red dot marking the location. The map is set against a background of a topographical relief. At the bottom of the page, there's a footer with a copyright notice for Mardi 21 octobre 2014.

La pagina del sit *Eraldica Occitana* a la fin de novembre de 2014

Adreça del sit: <http://eraldica-occitana.over-blog.com>

Nos regaudissèm d'aquela iniciativa qu'enriquesís nòstras coneissenças de la simbolica en Occitània, que las bandièras, coma endacòm mai, son sovent de meras adaptacions dels escuts e blasons.

VEXIL'ÒC



REVISTA OCCITANA DE VEXILOLOGIA - ISSN 2117-9166

N°21 - DECEMBRE DE 2014

Redaccion e compaginacion acabadas lo 27 de decembre de 2014.

Ancians numeròs: <http://bandieras.free.fr/vexiloc> o
<http://vexiloc.tripod.com> o
<http://vexiloc.eu.pn>

Imatges e cartas de còp tirats de:

- *Flags of the World*, ISSN 1712-9842,
<<http://www.fotw.net/flags/index.html>>
- Wikipèdia, <<http://oc.wikipedia.org>>
- *Eraldica Occitana*, <<http://eraldica-occitana.over-blog.com>>

ISSN 2117-9166



9 772117 916000